

養  
生  
類  
纂

養生類纂卷第十四

案 菴 周 守 忠 纂集

鄉貢進士錢塘縣知縣樵陽謝頻校正重刊

食饌部二

酒醉附

茶

湯水

五味

鹽

醋

將薑豉附

糖蜜錫附

酥酪

脯腊

膾

鮓鰯 附

酒醉附

唯酒無量不及亂論語註云人飲酒無有限量但不得多以致亂

飲酒過多成血脾之疾華佗中藏經

久飲酒者腐腸爛胃潰髓蒸筋傷人損壽千金要方

酒味苦甘五辛大熱有毒行藥勢殺百邪惡味 同上

食生菜飲酒莫炙腹令人腸結同上

飽食訖多飲水及酒成痞癖同上

勿飲濁酒食麵使塞氣孔同上

酒漿臨上看之不見人影者勿食之同上

飲酒不欲使多多則逆吐之為佳同上

酒不可合乳飲令人氣結食禁方

飲酒食红柿令人心痛至死亦令人易醉同上

飲酒食生蒼耳令人心痛同上

飲白酒食生韭令人病增同上

飲白酒以桑枝貫牛肉多食生寸白虫同上又按本草又云白酒食

牛肉生虫

凡飲酒忌諸甜物本草拾遺

酒後不可食芥辣物緩人筋骨又不可食胡桃令人嘔血瑣碎錄

飲酒不可食羊豕腦大害人同上

飲酒之法自溫至熱若於會散時飲極熱酒一盃則無中酒之患同上

麵後如飲酒須以酒嚥去目漢椒三兩粒即不為疾同上

銅瓶器不可久貯酒能殺人時暫則無害同上

飲酒熱未醒以冷水洗面令人面發瘡輕者破皰葉氏病源

飲酒人飲水成酒癖嘔吐疾同上

淫酒於酒色者將以萌虛癰黃疸腸癖痔漏之疾食治通說

醉當風卧以扇自扇成惡風千金要方人病源云醉卧當風使人發

醉以冷水洗浴成疼痺同上

大醉汗出當以粉傅身令其自乾發成風痺同上

醉不可當風向陽令人發狂同上

醉不可強食或發癰疽或發瘡或生瘡同上

醉飽不可以走馬及跳躑同上

飲酒大醉濕地而卧或立當風衝厨下露坐成癩病千金翼方

酒癩者飲酒大醉不寢卧忝穰中經夜方起遂即成疾眉鬚墮落同

上又千金要方云醉不可露卧及卧忝穰中發癩瘡又金匱要

略方云飲酒食猪肉卧秫稻穰中發黃

飲酒者嚼雞舌香則量廣浸半天回則不醉酒中玄

醉不可露卧令人面發瘡皰菓氏病源

酒之毒在齒每飲一盃即吸水漱滌則不醉避奇問覽

一月之忌晦無大醉謂飲酒至醉已傷血氣又人之血脉隨月盈虧

月郭滿具血氣實肌肉堅月郭空則肌肉減經絡虛衛氣去形

獨居當是時也又大醉以傷之是以重虛故云晦夜之醉損一

月之壽也千金翼方

欲醒酒食橄欖瑣碎錄

宿醒未解用蜜浸烏梅多啖清醒乃已樵人直說

九子酒飲之有力糯米一斗微蒸熟研之好杏仁五十枚湯浸去皮  
研之大麥麩一兩神麴七兩防風當歸乾薑甜瓜子甜瓜蒂菊  
花桂心各二錢並為末以好酒二斤煎熟合和上件藥末如調  
稠糊相似入在埧器中用蠟紙數重封冬天煖放半月夏間六  
七日足取丸如酸棗大凡遇飲冬月煎水十盞著藥三九夏月  
新汲水十盞入藥三九在一瓶中候時飽用竹杖子攪轉聞香  
美即飲之林泉備用

山芋酒飲之有益山芋蒸熟去皮一斤酥三兩龍腦蓮的同研圓如  
雞卵投沸酒中一枚可酒半升山芋當取山生者暴十餘日皮

皺可用之甚美沈存中忘懷錄

枸杞酒方枸杞一百斤切以東流水四石煮之一日一夕去滓得一石汁漬麴釀之如家醪法酒熟取清置不津器中取乾地黃末一升桂心末一升乾薑末一升商陸根末一升澤瀉末一升蜀椒末一升右六味盛以絹袋內酒底密封口埋入地三尺堅覆上二十日沐浴整衣冠向仙人再拜訖開之其酒當如赤金色平旦空肚服半斤為度十日万病皆愈二十日癰疽瘰癧惡疾人以一升水和半升酒分五服服之即愈此出千金翼方又四時纂要枸杞子酒補虛長肌肉益顏色肥健延年方枸杞子好酒二升搗碎浸七日漉去滓日飲三合

蒲萄酒法取蒲萄子汁一斗用麴末四兩攪勻入瓶內封口自然作酒別有異香又以蜜三斤水一斗同煎入瓶內候溫入麴末二

兩白醪二兩濕紙封口放淨處春秋五日夏三日冬七日自然  
為上等酒一斗如行功時只吃一兩盞助道力功疾成也百病  
消除又仙酎麴法爛桃去皮核十斤爛甜瓜去皮子十斤白麵  
六十斤官桂三兩紅豆三兩縮砂三兩右搗勻踏之如法卧三  
七日上白青木黃沙間道士也並出張真人金丹了心訣

鍾乳酒主補骨髓益氣力逐濕方乾地黃八分萐藤一升熬別爛搗  
牛膝五加皮地骨皮各四兩桂心防風各二兩仙靈脾三兩鍾  
乳五兩甘草湯浸三日以半升牛乳瓷瓶中浸炊之於炊飯上  
蒸之牛乳盡出暖水淨淘洗碎如麻豆右諸藥並細剉布袋子  
貯浸於三斗酒中五日後可取飲出一升清酒量其藥味即出  
藥起十月一日至立春止忌生葱陳臭物四時纂要

黃精酒主萬病髮白反黑齒落更生方黃精四斤天黃冬三斤松葉

六斤白朮四斤枸杞五斤右五味皆生者內釜中以水三石煮之一日去滓以汁漬麴如家醞法酒熟取清任性飲之一劑長年千金翼方

白朮酒方白朮二十五斤咬咀以東流水兩石五斗不津器中漬之二十日去滓內汁大盆中夜俟流星過時杪已姓名置盆中如是五夜汁當變如血取以漬麴如醞法酒熟取清任性飲之十日萬病除百日白髮反黑齒落更生面有光澤久服長年同上松花酒取糯米淘百搗以神麴和凡米一斗用神麴五兩春月取松花精長五六寸者至一尺餘鼠毛者各三兩枝細剉一升蒸之絹袋盛以酒一升浸取五日堪服一服三合三服久服神仙齊人千金月令

地黃酒用地黃一大升細切糯米五斗右相和爛炊作飯攤如人体

以牛膝汁三升拌之麴末五升並於盆中熟揉以湯一斗內不  
津器中泥封春夏三七日秋冬五七日熟同上又四時要纂地  
黃酒變白速効方肥地黃切一大斗搗碎糯米五升爛炊麴一  
大升右三味於盆中熟揉相得內不津器中封泥春夏三七日  
秋冬五七日日滿有一盞渌液是其精華宜先飲之餘以生布  
絞貯之如稀錫極甘美不過三劑髮當如漆若以牛膝汁拌炊  
飯亦妙

齊解

叔讓母病風空中語曰得丁公藤為酒便差後求訪至宜都郡

見山中衆老翁伐木云此是丁公藤瘰癧風尤驗乃以四段與之  
示以漬酒法母病果安

寶朝

議經進仙酒方治大風及偏風一切風疾延年益壽牛蒡根一

斤牛膝一斤秦艸二兩鼠粘子二兩枸杞子炒一斗蒼朮蒸二

斤防風蚕沙各二两大麻子炒別研去殼一升桔梗羌活各二兩右為剉散無灰酒二斗淨瓷器內浸密封七日開開時不得對瓶口日進三服每服一大盞溫服常令面有酒色甚者不過一斗忌麪食并魚肉動風物三因極一病證方論

還睛

神明酒黃連五兩石決明草決明黃消石生薑石膏麝人秦皮

山茱萸當歸黃芩沙參朴硝甘草已上各三兩芍藥澤瀉桂心薺子車前子淡竹葉防風辛美人參柏子人白芷川烏頭桃人去皮尖雙人瞿麥細辛地膚子已上各三兩龍腦三錢丁香半兩真珠二十五顆無孔者右咬咀以練囊盛用好酒五斗瓮中浸之春秋十四日夏七日冬二十一日食後半合勿吐稍稍增之百日後目明如舊忌麪鮓油膩穢臭五辛猪魚雞馬驢肉生冷枯滑仍忌房室大怒大勞大憂愁大寒熱悉慎之惟不療枯

睛損破者但白睛不枯損此藥更生瞳子平復如故漢司空蒼元明兩目俱盲經十五年兩瞳子皆損服此酒未滿百日兩眼還得清淨夜視字勝如未患時十倍余親有病目者服此酒十餘日翳皆省蘇沈二內翰良方

王文正太尉氣羸多病

真宗賜藥酒一餅文正飲之安健上

曰此蘇合香酒一斗酒以蘇合香丸一两同煮調五歲却諸疾客揮筆

茶

除煩去膩不可闕茶然暗中損人不少吾有一法每食已以濃茶漱口煩膩既出而脾胃不知肉在齒間消縮脫去不煩挑刺有數日一啜不為害也此大有理仇池筆記

苦茶久食羽化與韭同食令人身重居士食忌

茶吃多則滯在腰背故令人自腰而下多黑但吃茶常湏投少鹽緣

鹽通自然無滯四時養生論

飲真茶令少眠睡博物志

苦茶久食益意思華佗食論

茶以湯澆覆之用葱薑芼之其飲醒酒令人不眠廣雅

敗荷片為末於茶飲中吃不日羸瘦却不損人如要復吃醋則復長

肌肉也瑣碎錄

茶用山水江水上井水下其山水揀乳泉石池慢流者其江水取

去人遠者并取汲多者其湍如魚目微有聲為一沸緣邊如沸

泉連珠為二沸騰波鼓浪為三沸已上水老不可食也經羽茶

茶茗久服令人有力悅志神農食

湯水

冬日則飲湯夏日則飲水孟子

食熱物勿飲冷水金匱要畧方

凡水照見人影動者不可飲之同上

凡諸飲水療疾皆取新汲清泉不用停汙濁者損人博物志

飲水忽急咽久成氣疾或成水癖巢氏病源

盛夏胃暑難以全斷飲冷但刻意少飲勿與生硬果菜油膩甜食相

犯亦不至生病也不宜引飲過多先能省減鹹酸厚味煎燂燥

物自然津液不乏必不致引飲太頻也食治通說

銅湯瓶湯飲之損声瑣碎錄

伏熱者不得飲水衝寒者不得飲湯同上

仁宗朝宣翰林院定熟水紫蘇第一沉香第二麥蘖冬第三蓋紫蘇能

下膈滯氣乃為第一也同上

鼓湯用百沸湯泡切不得攪絕攪則味苦俗謂之攪破膽同上

凡山水甚強寒飲之皆令人病太平御覽

飲不欲過多謂未厭先止也或欲酸甘桂漿務爽口而非為渴則不免為痰飲之疾食治通說

棗湯法石取大棗除去皮核中破之於文武火上翻覆炙令香然後煮作湯齊人千金月令

栢湯方採嫩栢葉線繫垂掛一大瓮中紙糊其口經月取如未甚乾更閉之至乾取為末如嫩草色不用瓮只密室中亦可但不及瓮中者青翠若見風則黃矣此湯可以代茶夜話飲之尤醒睡飲茶多則傷人氣耗精害脾胃栢湯甚有益如太苦則加少山芋尤佳外臺祕要有代茶新飲然作藥味不若栢湯隱居道話尤助幽尚沈存中志懷錄

三妙湯方地黄枸杞實各取汁一升蜜半升銀器中同煎如稀飴每服一大匕湯調酒調皆可實氣養血久服弥益人同上

熟水方稻葉穀葉楮葉橘葉樟葉皆可採乾紙囊懸之用時火炙使香湯沃幕其口良久可飲同上

水芝湯通心氣益精髓用乾好蓮實一斤不去黑風以砂炒令極乾搗羅為末甘草一两橫紋者剉微炒石為末每服二錢入鹽沸湯點服蓮實搗羅至黑皮如鉄不可搗則去之世之貴人取蓮實去黑皮及澁皮及蓮心以龍腦水浸白肉食之大為不便黑皮堅氣而澁及佳精世人多不知也此湯夜坐過飢氣乏不欲取食則飲一盞大能補虛助氣昔仙人務先子服此湯以致飛昇去衛生家室湯方

五味

心欲苦肺欲辛肝欲酸脾欲甘腎欲鹹此五味之所合也黃帝素問  
五味所禁辛走氣氣病無多食辛鹹走血血病無多食鹹苦走骨骨  
病無多食苦甘走肉肉病無多食甘酸走筋筋病無多食酸是  
謂五禁無令多食同上

多食鹹則脉凝泣而色變多食苦則皮槁而毛拔多食辛則筋急而  
爪枯多食酸則肉胝胗而脣揭多食甘則骨痛而髮落此五味  
之所傷也同上

五味入於口各有所走各有其病酸走筋多食酸令人癢鹹走血多  
食鹹令人渴辛走氣多食辛令人愠心苦走骨多食苦令人變  
嘔甘走肉多食甘令人惡心千金要方

好食五味必不得暴噎多令人神驚夜夢飛揚也同上  
鹹傷筋苦傷骨甘傷肉辛傷氣酸傷血太清中黃真經

諸熱食鹹物竟不得飲冷水酢漿水等令人喜失声云笈七籤  
減五味濃厚食以免傷其精省煎燂焦燥物以免滲其血食治通說  
五味無令勝穀味同上

味過於鹹傷肌骨而耗心氣味過於酸傷筋脉而損脾氣同上

穀味即正味也本於天地合氣陰陽出於造化自然如小豆味酸大  
豆味鹹麥苦稷甘之類雖不美於舌本足以充胃脘而養冲氣  
也味外五味即非本味也或淋鹵滷或拌糟糠菹其葷辛熱以  
蔗汁成於因而變釀如鹽醃醋苦梅酸薑辣之類雖取美於舌  
頰復為腹胃之竊蠹也同上

鹽

鹽鹹走血故東方食魚鹽之人多黑色走血之驗病嗽及水者宜全  
禁之齒縫中多血出常以鹽湯漱於則已益齒走血之驗也本

草行義

鹽多食傷肺喜效千金翼方

鹽不可多食傷肺令人失色膚黑損筋力千金要方

食甜粥已食鹽即吐金匱要略方

食甜瓜竟食鹽成霍亂食齋心鏡

鹽三升蒸令熟分作二裏各裏之於脚頭著壁脚心踏之去一切脚

氣夜夜為之良食療本草

漱口以鹽揩齒少時含漿

便洗眼朝

洗之可夜見字同上

齒疼斷開血出以鹽每夜厚封齒斷上有汁漚盡乃卧汁出時叩齒

勿住不過十夜疼血止肘後方

鹽忌安竈頭上墨子祕錄

米醋最嚴穀氣全也產婦房中常得醋氣則為佳酸益血也本草衍義

多食醋損人骨能理諸藥消毒熱千金要方

醋合酪食之令人血癥金匱要略方

凡醋不可與蛤同食食禁方

米醋多食不益男子損顏色日華子本草

服諸藥不可多食醋食療本草

醋多食損人胃同上

飲熱醋尤能辟寒勝如酒瑣碎錄

醬豉附

雷不作醬俗說令人腹內雷鳴風俗通

小豆醬令魚酢食之成口瘡孫真人食忌

麥醬和鯉魚食之成口瘡本草

醬無毒殺一切魚肉菜蔬簞毒日華子本草

偷人醬多食落髮食療本草

豉食中之常用春夏天氣不和炆炒以酒漬服之至佳  
調隱居藥摠熬豉和白朮浸酒常服之辟瘟疫梅師方

豉湯豉本性太冷只辟麵毒傷臟腑傾元氣特宜忌之  
中山玉櫃服氣經

### 糖蜜餉附

糖蜜不可與鮫同食令人暴下食多尤為害瑣碎錄

鮮瓶不可盛蜜及蜜煎食之損氣同上

食糖蜜後三日內食諸生葱韭令人心痛金匱要畧方

沙糖多食生長虫消肌肉損齒發疳墮不可長食之食療本草  
沙糖不可與笋同食食之笋不消成癥身重不能行履食禁方

沙糖不與鯽魚同食食之令人成疳虫同上

沙糖不與葵同食食之生流癖同上

白蜜不可合菰首食之同上

白黍米不可與飴糖蜜食之同上

食飴多飲酒大忌金匱要畧方

飴糖即飴是也多食動脾風本草衍義

### 酥酪

乳酪酥等常食之令人有筋力膽幹肌體潤澤卒多食之亦令臃脹

泄利漸自巳千金要方

食甜各竟即入大酢者亦可作血瘕及尿血同上

大酪不熟食食之傷人食禁方

凡食生魚後即飲乳酪發動則損之精氣腰脚疼弱同上

凡食生肉飽飲乳謂酥酪之類變成虫同上

脯腊

茅屋漏水墮諸脯肉上食之成瘕結千金要方

凡暴肉作脯不肯乾者害人同上

暴肉不乾火炙不動見水自動者不可食金匱要畧方

羊脯三月以後有虫如馬尾有毒殺人本草

脯藏米瓮中有毒及經夏食之發腎病同上

凡脯生食之不消化為虫食禁方

凡生熟脯肉以器蓋密使氣不泄者食之殺人同上

市脯不食論語

膾

膾不厭細論語

食膾吃乳酪令人腹中生虫為瘕金匱要略方

鯢膾共猪肉食之令人惡心多唾損精色食禁方

魚膾諸醒冷之物多損於人斷之益善千金要方

凡魚膾不可近夜食不消兼飲冷水腹內為虫又不可同乳酪食之

令人霍亂本草

廣陵太守陳登得病胸中煩懣面赤不食華佗脉之曰府君胃中有

虫数升欲成内疽食腥物所為也即作湯二升先服一升斯須

盡服之食頃吐出三升許虫赤頭皆動半身是生魚膾也魏志

鯢魚膾合猪肝肺食之發癰疽巢氏病源

魚赤目作膾食之生魚瘕同上

鮓熬臙 附

頭髮在魚鮓內殺人瑣碎錄

貯蜜瓶不可貯鮓必害人同上

青魚鮓不可合葫荽食之食禁方

青魚鮓不可合生葵及麥醬同食之同上

鯉魚鮓不得和豆藿葉食之成瘕食療本草又食禁方云鯉魚鮓不

可合小豆藿食之

鱸魚作鮓食之猶良本草

有人遺張華鮓見之謂客曰此龍肉也肉鮓中有五色光試之果如

言後問其主云於茅積下得白魚所作也世說

魚目亦作鮓食之害人千金要方

周絳諸兩浙獻書吳越王重之留客館將著以名賤賚絳功巨堂酒

給魚鮓數百斤絳引

焚魚而食海物苦鹹傷肺大煩渴一

夕幾至委頓楊文公談苑

蟹為臠味食可長髮續百 雜  
凡魚醬及肉醬多食落髮為陳久故也食療本草

養生類纂卷第十四

養生類纂卷第十五

察菴周守中纂集

鄉貢進士錢塘縣知縣樵陽謝頴校正重刊

羽禽部

總禽

鴛鴦

孔雀

鸚鵡

鸞

鴈

雀

鴝

鳩

鴉

雉

竹雞

雞

鵝

鴨

白鳥玄首玄鳥白首不可食本草

凡鳥目生吞之令人見諸魅或以目睛研注目中夜見鬼

鳥三足四距殺人

鳥六指不可食

鳥死足不伸不可食

鳥卵有八字不可食同上

凡鳥飛授人其口中必有物拔毛放之吉同上

凡鳥自死口不閉翅不合者不可食之金匱要畧方

諸禽肝青者食之殺人同上

凡飛鳥授人不可食雲笈七籤

鳥若開口及毛下有瘡並不可食之同上

鴛鴦

食鴛鴦肉令人患大風本草

夫婦不相愛私煮鴛鴦肉食之當相愛也食療本草

孔雀

孔雀毛入眼損人眼瑣碎錄

鷓鴣

鷓鴣不可與筍同食令人腹脹食禁方  
鷓鴣自死者不可食之同上又按食療本草云此鳥天地之神每月

鷓

人食燕肉不可入水為蛟龍所吞博物志  
勿食燕肉損人神氣千金要方

鴈

勿食鴈肉損人神氣千金要方  
鴈脂可和豆黃末服令人肥白食療本草

雀

雀肉不可合醬食之陶隱居藥總訣  
雀肉不可合李子食之金匱要畧方  
雀肉不可合雜生肝食之食禁方

雀糞和乾薑末蜜丸服之令人肥白又和天雄乾薑為丸令陰強又  
外和天雄為丸服起陽事食療本草

鴽

鴽和生薑煮食止洩痢酥煎偏令下焦肥本草

鴽肉與猪肉食之令人生黑子同上

鴽肉不可和菌食之令人發痔同上

鴽四月已後八月已前不堪食食療本草又本草云

鴽患痢人可煮食良同上

鴽

班鴽多食益氣助陰陽本草

鴽

鴽瘦病嗽骨蒸者可和五味腌炙食之食療本草

鴉眼睛研注人目中令夜見鬼神同

雉

雉不與胡桃同食令人發頭風兼發心痛食療本草

雉不與木耳菌子同食發五痔立下血同

雉不與豉同食殺人同

雉肉不可和蕎麥麪食之生肥虫同

雉卵不可與葱同食生寸白虫同

雉肉久食令人瘦千金要方

丙午日食雉肉丈夫燒死目盲女人血死妄見同

雉一名山雞養之懷火山海經

竹雞

唐崔鉉鎮渚宮有宮賈舶居中夜暴亡迨曉氣猶未絕隣房有武陵

工梁新聞之乃與診視曰此乃食毒也尋常嗜食何物僕夫  
曰好食竹雞每年不下數百隻近買竹雞併將克饌梁新曰竹  
雞喫半夏必是半夏毒也命生薑搗汁折齒而灌由是方蘇崔  
聞而異之資以僕馬錢帛入京此夢瑣言

雞

玄雞白頭食病人龍魚河圖

雞有六指亦殺人

上同

雞有五色殺人同上又千金要方云雞是五色者食其肉必死

老雞能呼人姓名殺之則止白

圖

雞有四距重翼者龍也殺之震死

上同

雞肉合魚肉汁食之成心瘕食禁方

雞并子不可合李子食之

上同

雞肉或子不可合胡荽蒜食之令人滯氣上同

雉雞肉不可合生葱芥菜食之上同

雞子不可合鯉魚食之上同

雞死不伸足爪此種食之害人千金要方

雞子白共蒜食之令人短氣上同

雞子共鰾肉蒸食之害人上同

雞肉共獺肉共食作瘻尸注藥所不能治上同

食雞子噉生葱變成短氣上同

雞肉犬肝腎共食害人上同

生葱共雞犬肉食令人穀道終身流血上同

烏雞肉合鯉魚肉食生癰疽上同

雞兔犬肉和食必泄利上同

野雞肉共家雞肉合食之成遁尸尸鬼纏身四肢百節疼痛同

丙午日食雞肉丈夫燒死 盲女人血死妄見同上

雞子多食動風氣食療本草

半夜雞啼則有憂事瑣碎錄

雞生子皆雄者必有喜事瑣碎錄

烏雞最暖可補血產婦可食同上

閤雞善啼雞毒同上

踏雞子殼令人得風西陽雜

鵝

鵝肉性冷不可多食令人易霍亂食

草

老鵝善嫩鵝毒瑣碎錄

鵝毛柔暖而性冷選細毛夾以布帛絮而為被偏宜覆嬰兒而辟驚

痼也嶺南異物志

鴨

鴨目白者殺人本草

鴨卵多食發冷疾日華子本草

鴨不可與木耳胡桃豉同食上同

白鴨補虛黑鴨發冷痢下脚氣不可多食食療本草

鴨子微寒少食之亦發氣上同

老鴨善嫩鴨毒瑣碎錄

鴨子不可合蒜食之食禁方

鴨子不可合鱉肉食之上同

鴨子不可合李子食之上同

野鴨九月已後即中食全勝家者雖寒不動氣人身上小熱瘡

不可者但多食之即差食療本草

養生類纂卷第十六

察 菴 周 守 中 纂集

鄉貢進士錢塘縣知縣樵陽謝頴校正重刊

毛獸部

總獸

羊

牛

馬

驢

麋

鹿

麀

麂

麇

麝

麋

象

猪

犬

虎

猫

兔

總獸

家獸自死其膾汁食之作疽瘡千金要方

野獸自死北首伏地不可食同上

獸赤足者不可食有岐尾不可食同上

獸自死無傷處不可食同上

甲子日勿食一切獸肉大吉同

凡六畜五藏著草自動搖及得鹹酢不變色又隨地不汗又與犬犬

不食者皆有毒殺人同

六畜卒疲死及夏病者腦不中食喜生腸癰巢氏病源

羊

羊有一角食之殺人龍魚河圖

羊有一角當頂上龍也殺之震死白澤圖

羊肉同鱸酪食之害人食治通說

羊肝得生椒破人臟同上

羊肉共鮓食之傷人心亦不可共生魚酪和食之害人千金要方

凡一切羊蹄甲中有珠子白者名羊懸筋食之令人癩同上

白羊黑頭食其腦作腸癰同上

羊肚共飯飲常食久以成反胃作噎病

同上

甜粥共羊肚食之令人多唾喜吐清水

同上

青羊肝和小豆食之令人目少明

同上

羊腦男子食之損精氣

同上

彌忌水中柳木及白楊木不得銅器中煮

同上

子絕陰

同上

羊肉其有宿熱者不可食之金匱要畧方

青羊肝食之明目藥性論

羊心有孔者食之殺人日華子本草

羊肝不可合猪肉及梅子小豆食之傷心太病人

同上

凡羊肉不可以食病人

同上

羊肉不得以棗櫨木炙食之令人腹生虫食禁方

白羊肉不可雜雜肉食之

同上

山羊肉不可合雞子食之

上同

羊肝不可合烏梅白梅食之

上同

山羊肉不可合鱉肉同食

上同

羊肝有竅者食之害人瑣碎錄

羊不醬喫之久而閉氣發痼疾

上同

鼻中毛出晝夜可長五寸漸漸麤圓如繩痛不可忍雖忍痛摘去即

復更生此由食猪羊血過多治用乳石

明砂

各一兩為末以飯

丸如桐子大空心臨卧各一服水下十粒自然退落

夏子益治奇疾方

牛

牛肉不得和黍米白酒食之必生白虫食療本草

牛者稼穡之資不可屠殺自死者血脉已絕骨髓已竭不堪食黃牛

發病黑牛尤不可食

上同

飲白酒以祭枝貫牛肉炙食并生粟生寸白虫巢氏病源

烏牛自死止首者食其肉害人千金要方

一切牛盛熱時奇死者摠不堪食食之作腸癰疾

患甲蹄牛食其蹄中柜篩之人令人作肉刺

獨肝牛肉食之殺人牛食蛇者獨肝

患病牛肉食之令人身體痿

牛肉共猪肉食之必作寸白虫

大忌人下痢者食自死牛肉必劇

一切牛乳汁及酪共生魚食之成魚瘦

疫死牛或目赤或黃食之大忌金匱要畧方

青牛腸不可合犬肉食之大忌

牛肺從三月至五月其中有虫如馬尾割去之勿食損人

食牛肉不可食栗子瑣碎錄

食牛肉損益用薑尤甚同上

花生最毒患眼人喫双育同上

食牛肉過多不腰脹却服食藥若脹者但欲水自消同上

食牛之人生遭惡鬼侵陵多染疫癘死入地獄受赦所不原之罪滅

殺編類

台州攝篆軍陳昌夢入東岳見廊下有數罪人悉斷割肢體號叫極

甚陳問陰吏曰此數人以食牛肉與殺害衆生故也既覺遂不

食牛肉與雞台州甚瘟疫環城幾無免者陳頗憂之神人告曰

子不食牛肉我常衛護邪疫之氣無自而入不必憂也是年不

染瘟疫同上

今人有不食牛肉而食牒子者亦是牛皮煎成與牛肉何異凡屬生

身之物皆不可食豈止戒肉而已同

好食牛肉人壽祿皆減百神皆散不食牛肉百神守之鬼不敢近同  
凡牛噉蹄即毛向後順有大毒食之害人食禁方

馬

白馬玄頭食之殺人龍魚河圖又千金要方云白馬玄頭食其腦令

人癲

白馬自死食其肉害人同

白馬青蹄不可食千金要方

患疥馬肉食之令人身体痒同

白馬鞍下烏色徹肉裏者食之傷人五臟同

一切馬汗氣及毛不可入食中害人同

馬脚無夜眼者不可食之金匱要畧方

馬肉不可熱喫傷人心同上

馬鞍下肉食之殺人同上

白馬黑蹄者不可食之同上

馬肉豬肉共食飽醉卧大忌同上文食禁方云馬猪肉共食霍亂

馬肝有毒食之殺人同上

馬肉不可與倉米同食必卒得惡疾十有九死不與薑同食生氣嗽

食療本草

食駿馬肉不飲酒殺人食禁方又呂氏春秋云春繆公失左驥見野

人殺食之繆公笑曰食駿馬肉而不飲酒命恐傷其性也過飲

之而去也

馬肉不可與蒼耳同食傷人同上

馬治溝欲深春欲如伏龜兩邊有迴毛曰騰蛇殺主口邊有迴毛曰

衙禍妨主白額入口名曰的盧奴乘客死主棄市迴毛在目  
下曰承統不利人也伯樂相馬經

驢

驢肉食之動風脂肥尤甚屢試屢驗曰華子以謂止風狂治一切風  
未可憑也本草衍義

驢病死者不任用食禁方

驢肉合猪肉食之成霍亂

同上

麋

孕婦見麋而子回目淮南子

麋脂不可近男子陰令痿千金要方

麋脂及梅李子若妊娠婦人食之令子青盲男子傷精金匱要畧方  
麋骨可煮汁釀酒飲之令人肥白美顏色本草

麋肉不可與雉肉同食同上又食禁方云麋雉肉同食令人發脚氣

麋肉多食令人弱房發脚氣

同上

麋肉不可合獺肉同食害人食禁方

麋肉不可雜鵠肉食之

同上

麋肉不可合生菜食之

同上

麋肉不可合蝦蟇同食之

同上

### 鹿

鹿一千年為蒼鹿又百年化為白鹿又五百年化為玄鹿玄鹿為脯

食之壽二千歲述異記

鹿膽白者食其肉害人千金要方

白鹿肉不可和蒲白作羹食發惡瘡

同上

鹿豹文殺人本草

鹿九月已後正月以前堪食食療本草

鹿角錯為屑白密五升淹之微火熬令小變曝乾更搗篩服之令人輕身益氣強骨髓補絕傷同上

麋

麋肉不可合鰕及生菜梅李果實食之皆病人金匱要畧方

麋肉不可炙食令人瘠渴食禁方

麋肉不可同蛤食令人成癥病同上

麋肉八月止十二月食之勝羊肉自十二月止七月動氣食療本草

麂

麂多食動人痼疾本草

麇

生麇肉共鰕汁合食之令人心痛千金要方

生麋肉共雉肉食之作瘰癧疾同上

麋

麋肉不可合鵠肉食成瘰癧病本草

麋

麋肉共鵠肉食之作瘰癧千金要方

麋脂中香治一切惡氣疰百疾研服之立差也食療本草

象

象肉不可食令人軀重本草

猪

白豕白蹄青爪不可食養生要集

猪肉不可久食令人遍體筋肉碎痛乏氣千金要方

猪腦損男子陽道臨房不能行事同上

猪腎不可久食令人少子精發宿病弱筋骨閉血脉虛人肌有金瘡

者食之瘡尤甚同上

猪腦男子食之損精氣少子同上

猪肝肺共魚鱸食之作癰疽同上

猪肝共鯉魚腸魚子食之傷人神同上

猪肺及糴和食之發疽同上又云八月勿食猪肺至冬發疽

猪心肝不可多食無益猪膽穿驚入心絕氣歸肝也瑣碎錄

猪肝鵪鶉同食令人面生黑點同上

猪肉久食動風氣令人暴肥蓋風虛所致本草

猪肉共羊肝和食之令人心悶金匱要畧方

猪肉不可與生胡荽同食爛人臍同上

猪肉不可合龜鱉肉食之害人同上

猪肉和葵食之令人氣少同

猪肉不可合烏梅食之同猪肉不可同合雞子同食令人氣滿悶同

食猪肉飲酒卧秫稻稊草令人發黃同

猪放田野間或食雜毒物而死者有毒或自死及疫死者亦不可食

之同

猪不薑喫之中年氣血衰面生黑黧同碎錄

食猪膏忌烏梅本草

猪脂不可合梅子食之金匱要畧方

野猪青蹄者不可食之食禁方

江猪多食者令人体重食療本草

豪猪不可多食發風氣令人虛羸本草

凡煮猪肉用桑白皮高良薑皂莢黃芩各數小塊同煮即食不發風

瑣碎錄

犬

白犬虎文南斗君畜之可致萬石也雜五行書

黑犬白耳大王犬也畜之令富貴同上

黑犬白前兩足宜子孫同上

白犬黃頭家大吉同上

黃犬白尾代有衣冠同上

黃犬白前兩足利人同上

人家養犬純白者凶狗經

犬黑色者養之能辟伏屍舌青斑者識盜賊則吠之瑣碎錄

白犬合海鮠食之必得惡病千金要方

白犬自死不出舌者食之害人同上

犬肉不可多食令人患瘡渴病本草

犬肉不與蒜同食損人

上同

犬懸蹄肉有毒殺人

上同

犬肉不熟食之成瘕龍魚河鬲

喫狗肉人減尅年壽穢穢編類又真武格聖記云食犬折壽祿作事

白大膽青犬為妙和通草桂為丸服令人隱形食療本草

犬春月多狂若鼻赤起而燥者此欲狂其肉不任食千金要方

虎

虎肉不可熟食壞人齒千金要方

猫

人家畜猫一產止一子者害其主急棄人乃免又云雖一產三四而

皆雄或皆雌者亦不可畜殞碌錄

兔

兔至秋深時則可食金氣全也本草衍義

兔肉和獺肝食之三日必成遁尸千金要方

兔肉共白雞肝心食之令人面失色一年成瘰癧黃同上

兔肉共姜食變成霍亂同上又金匱要畧方云兔著乾姜食之成霍

兔肉共白雞肉食之令人血氣不行同上又金匱要畧方云今人面

兔肉與薑橘同食令人卒患心痛不可治食療本草

兔死而眼合者食之殺人本草

兔肉不可與鵝肉同食令人血氣不行瑣碎錄

養生類纂卷第十六

第九

養生類纂卷第十七

寮 菴 周 守 中 纂集

鄉貢進士錢塘縣知縣樵陽謝頴校正重刊

鱗介部

龍 魚 鯉 魚 鯽 魚 鱸 魚

白 魚 青 魚 黃 魚 鰱 魚 鰻 魚

鱖 魚 黃 魚 比 目 魚 鰻 魚 黃 鱸 魚

石 首 魚 河 魴 魚 魴 魚 鰱 魚 鮮 魚

鰻 鱘 魚 鮎 魚 黑 鱧 魚 石 斑 魚 地 鱖

龜 鱉 蟹 蟹 蟹 蟹

牡 蠣 蛤 蜊 淡 菜 螺 蚌

蚶 煙 馬 刀 蜆 鰕

龍

忽見龍勿驚恠亦勿注意瞻視千金要方  
龍肉以醢漬之則文章博物志

魚

魚目有睫殺人本草

魚目得開合殺人同上

魚二目殺人同上

魚目合者不可食之金匱要畧方

魚白目不可食千金要方

魚目赤作鮓食之害人同上

魚赤目作鮓食之生魚瘕巢氏病源

魚頭正白如連珠至有上食之殺人食禁方

魚無鰓者殺人食療本草又千金要方云魚無全鰓發癰疽

魚赤鱗者不可食千金要方

魚連鱗者殺人本草

凡無鱗者有毒

食無鱗魚不可喫荆芥能害人瑣碎錄

魚有角食之發心驚害人千金要方

魚無腸膽食之三年丈夫陰痿不起婦人絕孕

魚腹內有白如膏食之發疽巢氏病源

魚白背不可食食禁方

魚無鬚者食之發癩

魚身有黑點者不可食千金要方

一切魚尾食之不益人多食有句骨著人咽

魚白鬚殺人腹下丹字殺人魚師大者有毒食之殺人本草

溪澗沙西中生者魚有毒多在腦中不得食頭上

凡魚羹以蔓菁煮之蔓菁去魚腥又萬物腦能銷身所以食鱸食魚

頭羹也

上同

魚不熟食之成瘕龍魚河馬

魚餒不食論語

二月庚寅日勿食魚大惡千金要方

大甲日勿食鱗甲之內金匱要方

凡食魚不可轉頭恐為骨所鯁瑣碎錄

魚投地塵上不汚不可食食禁方

魚不可合鷄鵝肉食之同上又食療本草云魚汁不可合鷄鵝肉食之

魚不得合雞肉食之金匱要方多食禁方云凡魚不可合烏雞肉

一切魚其菜食之作蛔虫蛭虫千金要方

凡食生魚後即飲乳酪發動則損人精氣腰脚疼痛食禁方

鯉魚

鯉魚至陰之物也其鱗三十六陰極則陽復所以素問曰魚熱中王

叔和曰熱即生風食之所以多發風熱諸家所解並不言曰華

子云鯉魚涼今不取直取素問為正萬一家風更使食魚則是

貽禍無窮矣本草衍義

修理鯉魚可去脊上兩筋及黑血毒食療本草

炙鯉魚切忌煙不得令薰著眼損人眼光三兩日內必見驗也

食桂竟食鯉魚肉害人千金要方

鯉魚不可合犬肉食之金匱要畧方

鯉魚不可合鱉鼈作羹食禁方

鯉魚子不可合猪肝食之害人上

鯽魚

鯽魚不可合猪肝食梅師方

鯽魚不可合狝雞肉食之金匱要畧方

鯽魚宜合葶作羹主胃弱本草

鯽魚子不宜與猪肉同食同上

食鯽魚不得食沙糖令人成甘虫食療本草

鯽魚不可合烏雞食之令人發疽食禁方

鯽魚不可與麥門冬同食殺人瑣碎錄

鱸魚

鱸魚肝有毒食之中其毒面皮剥落食禁方

鱸魚食之宜人不甚發病本草衍義

鱸魚多食宜人作鮓尤良一云多食發痲痺本草  
鱸魚不可與乳酪同食同

白魚

白魚新鮮者好食若經宿者不堪食令人發冷生諸疾食癆本草  
白魚多食泥人心同

青魚

青魚服木人勿飲本草

青魚不可同葵蒜食害人畜人千金月令

青魚不可合小豆藿食之食禁方

黃魚

黃魚發諸病不可多食亦發瘡疥動風本草

黃魚不宜和蕎麥麴同食令人失音食禁方

鰻魚

鰻魚父食令人肥健食療本草

鰻魚

鰻魚腹中有子毒令人痢下本草

鰻魚

鰻魚小兒食結癥瘕及嗽大人久食令人卒心痛并使人卒患腰痛  
食療本草

鰻魚不可與乾笋同食發癰瘕風也同上

鰻魚

鰻魚多食發疥本草

比目魚

比目魚多食動氣本草

鰕魚

鰕魚益氣力令人肥健仙人劉憑常食之食療本草

黃鰕魚

黃鰕魚醒酒亦無鱗不益人也 本草

食黃鰕魚後食荊芥湯即時死食他魚亦宜禁之出遼齋閑覽又鎖碎錄云食黃鰕魚不可食荊芥令人吐血取地漿飲之即解也

石首魚

石首魚和蓴菜作羹開胃益氣本草

河魨魚

河魨眼紅者獨肝者不可食瑣碎錄

食河魨罷不可啜葯頭茶上同

鰕魚肝及子有毒入口爛舌入腹爛腸本草

鮀魚

鮀魚即鼃也老者多能變化為邪魅自非急勿食之本草

鮀魚能吐氣成霧致雨梁周興嗣常食其肉後為鼃所噴便為惡瘡

此物靈強不可食上

鰕魚

鰕不可合白犬血食之金匱要畧方

鰕魚

鰕魚腹下黃者世謂之黃鰕此尤動風氣多食令人霍亂又有白鰕

稍大色白皆動風本草衍義

鰕魚不可合白犬血食之金匱要畧方

鰕魚不可以桑薪煮之本草

鰕是赤圀形類聖蛇宜放不可殺食真武啓聖記

食鰾折人壽祿作事不利同上

鰾魚

趙州鏡湖邵長者家女年十七八染瘵疾累年不愈女謂母曰妾無由脫此疾可將棺木盛我送長流水中不佞妾言我即自盡父母信此語有錢清江打魚趙十見棺木乃開見女子遂抱下舡中與飯并羹後獲大安趙十夫婦尋送邵長者家其遂驚喜問女如何得命女曰趙十日日煮鰾羹供我食食覺內熱之病皆無矣邵長者遂酬趙十三百金今醫所用鰾前乃此意也名醫錄又本草蜀椒云病瘵鰾和五味煮食

治蚊蟲以鰾魚乾者於室燒之即蚊蟲化為水矣聖惠方

鰾魚燒之熏麝中斷蛙蟲置其骨於箱衣中斷白魚諸虫咬衣服又燒之熏合屋免竹木生蛙虫食瘵本草

鮎魚

鮎魚赤目赤鬚無腮者食之並殺人本草

鮎魚不可與牛肝合食令人患風多壅滯本草圖經

鮎魚不可與野猪肉同食令人吐瀉同上

鯢魚即鮎魚也不可合鹿肉食之令人筋甲縮食禁方

黑鱧魚

鱧魚屬北方癸化至夜朝北不動項盤七點只宜放不可殺食真武

啓聖記又碑雅云鱧魚與蚰通氣其首戴星夜則北嚮蓋北方

之魚也

鱧魚有諸瘡者不可食令癰不戒或白色食療本草

鱧魚肺氣風氣人食之効同上

石斑魚

南方溪澗中有魚生石上號石斑魚作魚甚美至春含育則有毒不可食云與蜥蜴交也出遯齋閑覽

蛇

巳年不宜殺蛇續酉陽雜俎

見蛇莫打損毒瑣碎錄

凡見蛇交則有喜同上

若被蛇咬不得用口呵恐毒氣入口能害人

龜

龜肉共猪肉食之害人千金要方

秋果菜共龜肉食之令人短氣

同上

飲酒食龜肉并菰白米令人生寒熱

同上

六甲日勿食龜肉害人心神

同上

龜肉不可合瓜食之食禁方

龜肉不可合菹菜食之同

龜肉不可合酒果食之同

鱉

鱉係四足狀如神龜只宜放不宜殺食真武啓聖記

大忌食鱉折人壽祿作事不利同

鱉腹下成王字不可食千金要方

鱉三足食之害人同

鱉肉兔肉和芥子醬食之損人同

鱉肉共菹菜食之作鱉瘕害人同

鱉肉共猪肉食之害人同

六甲日勿食鱉肉害人心神同

鼈目四者不可食食其肉不得合雞鴨子食之金匱要畧方

鼈肉多食作癰瘕赤足者殺人獨目者殺人目白者殺人腹下有卜

字五字方可食領下有骨加鼈不利本草

鼈肉與雞肉食成癰疾

食鼈須看腹下有蛇鱗紋者是蛇不可食瑣碎錄

藥簡黃鼈能殺人

若買鼈須縮頭者頭若伸皆先死後煮不可食

蟹

蟹黑而小者謂之兇蟹食之害人瑣碎錄

蟹多食發嗽并瘡癬本草

蟹

蟹目赤者殺人食療本草

蟹腹下有毛腹中有骨不利人本草

蟹目相向足斑者食之害人千金要方

食蟹食红柿及荊芥令人動風緣黃下有一風虫去虫食之不妨瑣

碎錄

槽蟹如以紙灯照其瓶則沙而不可食同上

蟹八月腹内有芒真稻芒也未被霜食有毒埤雅

秋蟹毒者無藥可療目相向者尤甚博物志

蟹極動風体有風疾人不可食本草衍義

蟛蜞

蟛蜞不可食慈謨初度江不識而噉之幾死本草

牡蠣

牡蠣火上炙令沸去殼食之甚美令人細肌膚美顏色食療本草

蛤蜊

蛤蜊性冷乃與丹石相反服丹石人食之令腹結痛本草

淡菜

淡菜多食少煩悶目闇可微利即止本草

淡菜燒食即苦不宜人與少米先煮熟後除肉內兩邊鎖及毛了再

入蘿蔔或紫蘇或冬瓜皮同煮即更妙同上

螺

螺大寒療熱醒酒壓丹石不可常食食療本草

螺不可共菜食之令人心痛千金要方

蚌

蚌冷無毒明目除煩壓丹石藥毒本草

蚌共菜食之令人心痛千金要方

蚶

蚶每食了以飯壓之不令入已乾本草

蚶益血色利五藏健胃可火上煖之令沸空腹中食十數箇以飯壓

之大妙同上

蛭

蛭與服丹石人相宜天行病後不可食切忌之又云主背中煩悶邪

熱止渴須在飯食後食之佳本草

馬刀

馬刀京師謂之撞岸發風痰不可多食本草衍義

蜆

蜆多食發嗽本草

蝦

蝦蟇鬚及腹中通黑煮之反白者不可食金匱要畧方  
蝦動風發瘡疥食瘡本草

不可食生鰕鱧同上

鰕不可合雞肉食之損人同上

凡鰕鱧共猪肉食之令人惡心多唾損精氣食禁方

養生類纂卷第十七